

TUTÚ CÚÚ ÒÚ NÍ CADÚHA TÉ PĀBLÚ QUÍHÍⁿ NDAHA TÉ TIMÛTEÚ

Té Pāblú cādŭha-dé tutú quíhíⁿ ndaha té Timùteú

1 ¹Yúhú té Pāblú ní tendaha ñàha Yá Ndiöxí càháⁿ-í tnúhu Xítóhó Jesucristú núú ñāyiu, chi ducaⁿ ñí cachí Yă Ndiöxí cunduu. Te càháⁿ-í dàtná ní cachí Yă Ndiöxí sá ncháá nchòo ñāyiu ndècu ndihi Xítóhó Jesucristú naníhí tǎhú-ó. ²Te yúhú té Pāblú cādŭha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te diu-í ní sanu ichi ñaha-í xii-n ichi Xítóhó Jesucristú, te xicáⁿ tǎhù-í núú Dütú Ndiöxí ndihi núú Xítóhó Jesucristú sá ïo na chindee chitúu ñaha-gǎ xii-n, te cundàhú iní ñáhá-gǎ, te ducaⁿ ndì nduú-gá ná cádá te ío váha cuu iní-n cùndecu-n.

Cáháⁿ váha-o cuèndá Xítóhó Jesucristú

³Te cuèi nduu cuèi niú ducaⁿ-ni càháⁿ ndihi-í Yă Ndiöxí cuèndá-n, te ndàcáⁿ tǎhù-í núú-gǎ, te xìnu cuechi-í núú-gǎ dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndǎá-í núú-gǎ dàtná ní xóo cada-güedé. ⁴Te ío sàni iní-í naníhí tnáhá-ó cuèndá ío cudíí iní-í, chi ndàcu iní-í sá ïo ní ndáhyú-n sǎ ndìhú iní-n cùtnáhá ní quide ndee iní-í tnáhá-ó. ⁵Te nàha-í sá sàndáá ndisa iní-n Yă Ndiöxí dàtná ní ngüíta díhna-gá xítná-n tǎ Loidá ndihi ñáná-n tǎ Eùnicé quídě-yu, te cùtnuní ndǎá iní-í sá díú tnáhá-n ïo váha sàndáá iní-n-gǎ.

⁶Te xǎⁿ dándàcu iní ñáhà-í xii-n cuèndá sá ïo-gá nducu ndèe-n cada-n chiuⁿ ní nduu tǎhú-n nŭú Yă Ndiöxí cada-n, chi ní taxi-gá tnúhu ndee iní ní ngúndecu ndihi-n cùtnáhá ní sacáⁿ ndodo-í ndaha-í díquí-n sǎ díú chiúⁿ-gá cada-n. ⁷Te Espíritú sá ñí taxi Yá Ndiöxí ndécú ndìhi-o ñá túú cùu-xi ìⁿ Espíritú sá cádá nàcuáa yùhú-ó, chi cùu-xi ìⁿ Espíritú sá táxí tnúhu ndee iní cada-o chiúⁿ-gá, te diu-xi quide cuu iní tnáhá-ó ìⁿ ìⁿ-o, te diu-ni tucu-xi quide cutnuní iní-ó nàcuáa cada-o cùndecu-o. ⁸Te xǎⁿ nŭu vá cúcàhaⁿ núú-n cǎháⁿ váha-n cuèndá Xítóhó Jesucristú, te ni vǎ cúcàhaⁿ núú-n sǎ dúhá yìhi-í vecaá sá cuèndá-gá, te xìni ñuhu-xi sá tnáhá-n ndòho-n sá cuèndá tnúhu-gá, te cundee iní-n ndòho-n, chi Yá Ndiöxí chindee ñàha-gá xii-n. ⁹Te Yá Ndiöxí ní dácăcu nihnu ñaha-gǎ xii-o nŭú ùhú núú ndàhú, te

ní cachí-gá sá cádá-ó nchàa nacúaa cuíní méé-gă cunduu, te ducaⁿ nĩ quide-gá chi ducaⁿ nĩ sani iní méé-gă cunduu sá cádá vâha ñaha-gă xii-o, te ñá díú sã ïo váha quide-o ndecu-o ducaⁿ ni quide-gá. Te ndéé cútnàhá vátá ngăva-gá ñuyúú nĩ cachí-gá sá cádá vâha ñaha-gă xii nchaa nchoo ñăyiu ní ngúndecu ndihi Xítohó Jesucrístú vitna. **10**Te vitna cùtnuní iní-ó sã ïo váha quide ñaha-gá xii-o, chi ní quixi Xítohó Jesucrístú ñuyúú-a ní dácăcu nihnu ñaha-gă xii-o núú ùhú núú ndàhú, te Yaá-áⁿ nĩ quide-gá cuendá sá vã cùú-gá-ó cùú dúcáⁿ-ó, chi ní cachí-gá sá cùndecu-o ni caa ni quíhíⁿ te núu na quíndáá iní-ó tnúhu-gá.

11Te ní cachí-gá sá càháⁿ-í tnúhu-gá núú ñăyiu ñá túú cùu ñăyiu isràél te dacuàha váha-í-yu tnúhu-gá, te cuèi ndèni ní cuu ndècú-yu te quíhíⁿ-í càháⁿ-í tnúhu-gá núú-yu chi ducaⁿ nĩ cachí-gá cunduu. **12**Te cuendá xíăⁿ nándi sá ndóhò-í vitna cuendá-gá, dico ñá túú cùcahaⁿ núú-í chi cùtnuní váha iní-í nàcuáa sàni iní Xítohó Jesucrístú Yaá sàndáá iní-í, te yúhú ní dáñà-í méè-í núú ndáhá-gă, te cùtnuní ndáá iní-í sá cótó ñaha-gá xii-í ndéé ná sàá nduu nàcuaca ñaha-gá.

13Te vá dáñá ndèe-n càda-n nchaa nacúaa càháⁿ tnúhu váha ní dánèhé ñàhà-í xii-n, te ío quíndáá iní-n Yă Ndiöxí, te nchaa-o nàcuáa ndècu-o ndihi Xítohó Jesucrístú ío cuu iní tnáhá-ó ìⁿ ìⁿ-o. **14**Te cada cuendá váha-n sã vã dăma tnúhu Yă Ndiöxí sá nĩ taxi-gá ndécú ndihi-n, te Espíritú-gá sá nĩ taxi-gá ndécú ndihi-o chindee ñaha-xi xii-n.

15Te yòhó sa xìní-n sã nchàa ñăyiu ndècu distritú Àsiá, ñăyiu ní sàndáá iní tnúhu Xítohó Jesucrístú ní dáñá ñàhá-yu xii-í, te tnàhá té Fígeló ndihi té Hèrmógenés ní dáñá ñàha-güedé xii-í. **16**Te xìcáⁿ táhù-í núú Xítohó Jesucrístú sá ná chindee-gá cue ñăyiu cùu ndi mee té Onèsíforó, chi diu-dé ío vâi xito ní quixi-dé ní quide cuendá ñàhá-dě xii-í, te ní taxi-dé tnúhu ndee iní, te ñá túú ní cùcahaⁿ núú-dě sá yíhì-í vecaá. **17**Te cútnàhá ní xíndecu-dé ñuú Ròmá ducaⁿ-ni nĩ xóo nanducu ñàha-dé xii-í ndéé ndéé naníhí ñàhá-dě. **18**Te xìcáⁿ táhú tùcu-í núú Xítohó Jesucrístú sá ná cùndahú iní ñàhá-gă xii-dé nduu na sàá cundáá cuèchi nchaa ñăyiu. Te yòhó sa xìní ndáá-n sã ïo ní chindee ñàha-dé xii-o cùtnàhá ní xíndecu-o ñùú Éfesú.

Tée quide ndáá xínú cuèchi núú Xítohó Jesucrístú

2 **1**Te yòhó tée cùu datná ìⁿ déhe mee-í ío nducu ndèe-n cada-n nacúaa níhí ndéé-gă-n cùndecu-n ichi Xítohó Jesucrístú chi diu-gá chindee ñàha-gá xii-n. **2**Te nchaa tnúhu sá nĩ dánèhé ñàhà-í xii-n ndihi nchaa dava-gá ñăyiu, xíăⁿ danèhé-n dâva-gá cue tée quide ndáá cuendá danèhé-güedé dava-gá ñăyiu.

3Te cahni iní-n ndòho-n cunu cuechi-n núú Xítohó Jesucrístú dàtná cuiní-n ndòho ìⁿ sandadú sàhni iní-dé xínú cuèchi-dé. **4**Chi ni ìⁿ sandadú ñá túú nǎgá sání iní-dé cada-dé òré xínú cuèchi-dé cuèndá cudùu-dé núú tée tàxi tnuní ñáhá. **5**Te diu-ni ducaⁿ sǎtnahá-xi cùu tucu ìⁿ tée dàdiqui, chi núú vá dádiqui-dé nàcuáa tàú-xi cunduu te vá ñihí-dé sá ndúú tǎhú-dě. **6**Te núú ìⁿ tée xínu cuechi ío ndùcu ndee-dé quidé chùuⁿ-dé chíhí-dě tata, te diu-dé tàú-dé díhna-gá-dé ñihí-dě sá cùhúⁿ yǎhu-dé. **7**Te cani iní-n nchàa tnúhu càháⁿ-í-a, te Xítohó Jesucrístú chindee ñàha-gá xii-n te tecú tnùnín nchàa.

8Te ndacu iní-n sǎ Xítohó Jesucrístú ní cuu-gá ñaní tnáhá ndíi Dàvií, te ní xíhí-gá te ní ndoto-gá, te diu ducaⁿ ndùu tnúhu dànehé-í ñáyiu. **9**Te ío dàndoho ñaha ñáyiu xii-í cuèndá sá càháⁿ-í tnúhu-gá, te quide ñahá-yu xii-í dàtná quídě-yu ìⁿ tée ní quide ìⁿ cuéchi càhnu, chi ní chihi ñahá-yu vecaá xii-í, dico tnúhu Yá Ndiöxí chi vá ndácũ-yu nganí-yu. **10**Te xǎⁿ nũu cuèi nándi cùu nchaa sá quidé ñàhá-yu xii-í, dico quide cahnu iní-í cuèndá sá nánihí tǎhú tnàhá nchaa dava-gá ñáyiu cuiní Yǎ Ndiöxí cundecu ndìhi-gá, chi nchaa ñáyiu na tnàhá tnúhu ndìhi Xítohó Jesucrístú nduu tǎhũ-yu cundecú-yu ndìhi-gá núú ìo váha càa ndecu-gá ni caa ni quíhíⁿ.

11Te xéhe cúú-xí ìⁿ tnúhu ndáá cuiti:

Nchoo cùu-o datná ñáyiu ní xíhí ndìhi Xítohó Jesucrístú chi ñá túú-gǎ ndécú-ó ìchi cuehé ichi duha, te xǎⁿ nũu cuèi na sàá nduu cùú-ó ñùyú-a, dico diu-ni cundecu-o ndìhi-gá.

12Te núu na cùndee iní-ó ndòho-o nándi sá ndóhó-ó sǎ cuèndá-gá, te sáá nduu te cunuu-o ndìhi-gá.

Te núu na càháⁿ-ó sǎ ñà túú xíní-ó-gǎ, te diu-ni ducaⁿ cǔñaha-gǎ xii-o sǎ ñà túú xíní ñáhá-gǎ ná sàá nduu càda ndáá-gá cuéchi nchaa ñáyiu.

13Te núu nchoo ñà túú quide ndáá-ó ndècu-o núú-gǎ ñá, dico mee-gǎ chi ío ndáá quidé-gǎ, chi Yá Ndiöxí nchaa sá sání ìní-gá quidé-gǎ.

Tée quide nacuaa nduu vétú iní Yǎ Ndiöxí

14Te dandàcu iní-n nchàa ñáyiu ndècu ndìhi-o ichi Xítohó Jesucrístú nchaa tnúhu càháⁿ-í-a, te cǔñaha-n xii-yu sá Xítohó Jesucrístú cuiní-gá sá ñà túú-gǎ nándi tnúhu cútnàhá-yu, chi nchaa tnúhu càháⁿ-yu-án dácũita nihnu-xi ñáyiu ndèdóho ñaha xii-yu, chi ñá túú vèdana nàndíhi nchaa tnúhu-án. **15**Te ío nducu ndèe-n cada ndáá-n cùndecu-n núú Yǎ Ndiöxí, te cada-n chùuⁿ-gá nàcuáa nduu vétú iní-gá, te cáháⁿ ndáá-n tnũhu-gá, cuèndá sá vǎ cúcàhaⁿ núú-n nũú-gǎ. **16**Te vá cádá cuèndá-n nchàa tnúhu sá ñà túú

vëdana nàndíhi càháⁿ ñáyiú cuendá Yă Ndiöxí, chi nchaa ñáyiú càháⁿ tnúhu-áⁿ ndihi nchaa ñáyiú sàcúndedóho ñaha xíi-yu uuⁿ-gá quidé-yu nchaa sá cuèhé sá dúhá. **17**Te nchaa tnúhu-áⁿ cütenuu-xi dàtná quidé ìⁿ cuéhé sã ñãni ñaha xii ñáyiú xité nuu-xi ñihí yiqui cùnú-yu. Te tnàhá té Himèneú ndihi té Filetú càháⁿ-güedé tnúhu-áⁿ quidé-güedé dàtná quidé ñáyiú-áⁿ. **18**Te cue téé-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiöxí, chi càchí-güedé sá ncháá nchòo ñáyiú ndècu ichi Yá Ndiöxí cúú-ó dàtná cue ñáyiú sa ní ndoto, dico na cùú ndisa-o te vá ndótó-gã-ó càchí-güedé. Te dava ñáyiú ní dáñã-yu sá sàndáá iní-yu tnúhu Yá Ndiöxí sá dúcáⁿ càháⁿ-güedé. **19**Te cuèi ducaⁿ quide davá-yu, dico Yá Ndiöxí ní taxi ndècu-gá cue ñáyiú ni yùhu ni iní ndécú ìchi-gá, te cùtnuní sá ndécú ndìhi ñaha-gá xii-yu, chi ìⁿ xichi núú tütú-gá càchí-xi sá méé-gã xini-gá cue ñáyiú cùu cuendá-gá. Te ingá tucu xichi núú tütú-gá càchí-xi sá ncháá ñáyiú sàndáá iní ñáhã xii Xítóhó Jesucristú xini ñuhu-xi sá vã cùndècu-gá-yu ichi cuèhé ichi duha.

20Te ñáyiú cuica chi ndècu ndihí-yu vehé-yu cóhó sã ñi cuáha mee-ni dñíⁿ cuááⁿ, ndihi cóhó sã ñi cuáha mee-ni dñíⁿ cuixíⁿ, te nchaa cóhó-ãⁿ cúú-xí dàtná cue ñáyiú ñã túú ñã cùmãní núú Yă Ndiöxí. Te ndècu ndihi tucú-yu cóhó sã ñi cuáha mee-ni ñuhu, ndihi cóhó sã ñi cuáha mee-ni yùtnu, te nchaa cóhó-ãⁿ cúú-xí dàtná cue ñáyiú ñã túú quide ndáá núú Yă Ndiöxí. **21**Te nchaa ñáyiú ío ndècu yíñuhu núú Yă Ndiöxí cúú-yu ñáyiú ñã túú ñihí tnàhá ndìhi cue ñáyiú ñã túú quide ndáá núú-gã, te cue ñáyiú ndècu yíñuhu núú-gã-áⁿ ñà túú tnàhí quée cáva-yu quidé-yu nchaa chiúⁿ tahu-gá.

22Te ío cada cuendá-n vã cádá-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndècu-n ichi Yá Ndiöxí, te quindáá iní-n-gã, te cuu iní-n ncháa tnaha ñáyiú-n, te cundècu nahi-n, chi ducaⁿ tàú-xi cada-n ndìhi nchaa dava-gá ñáyiú sa ní nduu ndoo ní nduu nine iní-xi ñáyiú càháⁿ ndihi ñaha xii Yá Ndiöxí. **23**Te vá cádá cuendá-n ñi ìⁿ tnúhu xítnàha ñáyiú chi ñã túú vëdana nàndíhi-xi, chi núu na càda cuendá-ó te dícó dánáá ñáhã-xí. **24**Chi nchaa cue téé xinu cuechi núú Yă Ndiöxí xini ñuhu-xi cáháⁿ váha-güedé ndihi nchaa ñáyiú, te danèhé ñáhã váha-güedé tnúhu-gá, te cunduu càhnu iní-güedé te vá nàá-güedé. **25**Te vii vii cáháⁿ-güedé dóho nchaa ñáyiú sàá iní-xi, ñáyiú ñã túú tnàhá iní tnúhu ndáá tnúhu Yá Ndiöxí, te ducaⁿ te cudana Yá Ndiöxí cada-gá te ndixi túu iní-yu sá ñà túú quide váha-yu ndècú-yu te quindáá iní-yu tnúhu-gá. **26**Te ducaⁿ te cutnùní iní-yu sá sàcuíhná cùnùu-xi taxi tnuní ñáhã-xí xii-yu, chi dàcahu iní ñáhã-xí xii-yu quidé-yu nchaa nàcuáa cùu iní-xi ni cùu.

Nàcuáa cada ñáyiú òré sa ta cùyatni sáá nduu quìxi tucu Xítohó Jesucrìstú

3 ¹Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quìxi tucu Xítohó Jesucrìstú, chi dàvá-áⁿ ïo cada úhú-xi. ²Chi ngúíta ñáyiú cuhuⁿ iní-yu mee-ni sã cúú-xí mèé-yu, te cuhuⁿ iní-yu mee-ni dǐhúⁿ, te ío cada càhnú-yu mèé-yu, te cunduu yíchí iní-yu, te cáháⁿ cuèhé-yu cuendá Yă Ndiöxí, te vá quìndáá-gá iní-yu ni tătă-yu ni nănă-yu, te ni vă ndàcáⁿ táhú núú tnáhă-yu cuendá nchaa sá văha cada tnàhá-yu, te cadá-yu mee-ni sã ñà túú tnàhá iní Yă Ndiöxí. ³Te vá cúú ìní tnáhá ndì meé-yu, te nàá-yu te vá cuánàá-yu, te tee tnàhá-yu cuéchi neñúú, te vá cuánàá-yu cadá-yu nchaa sá cuèhé sá dúhá sàni iní-yu, te ío cunduu cuihna ìní-yu, te vá tnàhá iní-yu nchaa sá văha. ⁴Te dayuhu cuăha cuendá tnáhă-yu núú cuè téé cùchiuⁿ, te ío cunduu yïi ìní-yu cadá-yu nándi sá ñà túú văha, te ío cada nínu-yu mèé-yu, te mee-ni nchàa sá cúdíí ìní-yu cadá-yu, te vá cúdíí ìní-yu nanducu nìhnú-yu Yá Ndiöxí. ⁵Te quesàhá-yu sá tnàhá-yu ndècú-yu ichi Yá Ndiöxí dico vá cáďă-yu nchaa nàcuáa càháⁿ-gá.

Te yúhú càchí tnúhu-í xii-n sã vă nìhí tnáhá-n ndìhi nchaa ñáyiú ducaⁿ quide. ⁶Te dava ñáyiú-áⁿ quǐhíⁿ-yu dava vehe núú xǐndecu ñáyiú, te ngúíta-yu dandàhú-yu ñáyiú dǐhí ñá túú xìní dana cuendá Yă Ndiöxí, te ñáyiú dǐhí-áⁿ cúú-yu ñáyiú ndècu vihi cuéchi-xi, chi ío cùdíí ìní-yu quidé-yu nchaa nání sá cuèhé sá dúhá sàni iní-yu. ⁷Te cuèi ío dàcuahá-yu, dico ñá túú cùtnuní iní-yu nása cuáháⁿ tnúhu ndáá tnúhu Yá Ndiöxí. ⁸Te ñáyiú ducaⁿ dandahú ñáhá xii cue ñáyiú dǐhí-áⁿ ñà túú càháⁿ váha-yu cuendá tnúhu Yá Ndiöxí, chi quidé-yu dàtná ní quide ndíi Jănés ndìhi ndíi Jămbrés chi cue ndíi-áⁿ ñà túú ní cùu váha iní cue ndíi núú ndíi Moisés cuendá tnúhu ní cáháⁿ ndíi. Te ñáyiú-áⁿ cúú-yu ñáyiú sàni iní mee nìne-ni nchaa sá cuèhé sá dúhá, te cuèi càchí-yu sá sàndáá iní-yu Yá Ndiöxí dico ñá ndáá sá sàndáá iní ñáhă-yu xii-gá. ⁹Dico vá ndácú-gă-yu dandàhú-yu vâi ñáyiú, chi nchaa ñáyiú cutnùní iní-yu sá ïo nìi đǐquǐ-yu, te ñá túú càháⁿ ndáá-yu dàtná ní quide cue téé úú ñá túú ní tnàhá iní tnúhu ní cáháⁿ ndíi Moisés.

Té Păblú dásàhú-dé té Timùteú

¹⁰Te yòhó quidé-n nchàa nacuáa ní dánèhé ñáhà-í xii-n, te ní xìní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyúú-a, te xìní-n sã ïo sàndáá iní-í Yă Ndiöxí, te ío càhnu iní-í, te cùu iní-í nchaa ñáyiú, te xìní tucu-n sã ïo quide cahnu iní-í cuèi nándi sá yăha-í ndécù-í dico ñá túú dàña ndeé-í ichi-gá. ¹¹Te ío vâi sá quidé ñàha ñáyiú xii-í dándòho ñahá-yu sá ndécù-í ichi Xítohó Jesucrìstú, te sa nàha tucu-n datná ní quide ñàhá-yu xii-í cútnàhá ní xǐndecu-í ñuú Antiòquiá, ndìhi ñuú

Ìconiú, ndìhi ñuú Lìstrá, chí ío ní dándóhó ñàhá-yu xii-í sá cuèndá-gá. Dico Xítóhó Jesucrìstú ío ní xito ñaha-gă xii-í te ní chindee ñaha-gá cuèi nándi cùu sá ñí yáha-í. ¹²Te na cächí tnúhu ndáá-í xii-n sã ïo vãi sá ñà túú vãha cada ñaha ñãyiú xii nchaa ñãyiú cuìní sá ñà túú ñã cumání nũú Yã Ndiöxí cuèndá sá ndécú ndìhí-yu Xítóhó Jesucrìstú. ¹³Dico dava ñãyiú cächí-yu sá cãháⁿ-yu tnúhu Yá Ndiöxí te ñã ndáá sá cãháⁿ-yu tnúhu-gá, ñãyiú-áⁿ uuⁿ-gá cuita cada-gá-yu nchaa sá cuèhé sá dúhá quíhíⁿ, te ducaⁿ-ni ïo dandàhú tnáhã-yu.

¹⁴Te yòhó chí ío vãha ní sándáá iní-n tnúhu Yá Ndiöxí sá dacuàha-n, te vitna cãháⁿ-í dóho-n sã vã dáñá ndèé-n quìndáá iní-n tnúhu-áⁿ, te yòhó sa ñaha-n ná cúú ñãyiú ní dánèhé ñàhá xii-n tnúhu-gá. ¹⁵Te yòhó chí ndéé cútnàhá cúú làndú-n ñí ngüíta-n dàcuaha-n tnúhu ndèé núú tùtú Yã Ndiöxí, te diu-ni nchaa tnúhu-gá canu ichi ñaha-xi xii-n te naníhí tàhú-n, chí sándáá iní-n Xítóhó Jesucrìstú. ¹⁶Te nchaa cue téé ní tee tnúhu Yá Ndiöxí, chí diu-ni mee-gã ní dácáhú ìní ñàhá-gã xii-güedé nàcuáa tee-güedé, te tnúhu-gá ío vãha dacuàha-o nchaa dava-gá ñãyiú, te cãháⁿ-xi dóho-o sã vã cúndècu-gá-ó ichi cuehé ichi duha, te núú ñã túú quide ndáá-ó ndècu-o te nàcanu ichi ñaha-xi, te dànehé ñàhá-xí nàcuáa cada-o cùndáá-ó nũú Yã Ndiöxí. ¹⁷Te diu-ni tnúhu-gá dátüha ñaha vãha-xi xii nchoo cuè ñãyiú ndècu ndìhi-gá cuèndá cada-o nchaa núú sã vãha.

4 ¹Te Xítóhó Jesucrìstú quixi-gá taxi tnùnì-gá ñuyíú-a, te cada ndáá-gá cuéchi nchaa ñãyiú sa ní xíhí, ndìhi cuéchi nchaa ñãyiú xíndecu vívú. Te mee-gã ndìhi Yá Ndiöxí ñàhá-gã sá ïo cãháⁿ-í dóho-n vitna ²sá ïo dacuàha-n ñãyiú tnúhu-gá, te vá dáñá ndèé-n dàcuahá-n-yu ndèda-ni càa oré cuèi ñã túú cuìní-yu cundedóho-yu, te nchaa ñãyiú ñã túú cuìní cada ndáá cúñaha ndáá-n nchaa nacuáa quidè-yu. Te cúñaha tùcu-n xii-yu sá vã dúcáⁿ-gã cadá-yu, te cãháⁿ-n dõho-yu cuèndá cada ndáá-yu cundecú-yu. Te ío cunduu cãhnu iní-n òré cãháⁿ-n dõho-yu, te ío dacuàhá-n-yu tnúhu-gá. ³Chí sáá nduu te vá cächí-gá-yu cundedóho-yu nchaa tnúhu sá sánú ichi ñaha cundecu váha-o nũú Yã Ndiöxí, chí mee-ñã nchaa sá cúdíí ìní mée-yu cundedóho-yu, te ndúcú-yu cue téé danèhé ñàhá xii-yu nchaa tnúhu cùu iní-yu-áⁿ. ⁴Te vá cadá cuèndá tnàhí-gá-yu tnúhu ndáá tnúhu Yá Ndiöxí, chí mee-ñã tnúhu sá ñà túú nàndíhi cada cuèndá-yu. ⁵Dico yòhó ío quíhi iní-n cùndecu-n, te cahni iní-n cuèi nándi na ndòho-n, te dacuàha-ni-n ñãyiú tnúhu Yá Ndiöxí, ñãyiú vátá quìndáá iní ñàhá-gã xii-gá, te cada-ni-n nchaa chiuⁿ ní táhú-gã cada-n.

⁶Te yúhú sa ñùhu ichi-ná-í quíhíⁿ-í núú ndécú Yã Ndiöxí cundecu-í, chí sa ní cuyatni cahni ñaha-güedè xii-í cuèndá sá xínú cuèchi-í núú-gã. ⁷Te ní quide-í nchaa chiuⁿ ní táhú Yã Ndiöxí cada-í te vitna ní xínu cava nchaa chiuⁿ ní táhú-gã-áⁿ ñí quide-í, te ñã túú ní dàña ndéé-í ní sándáá iní-í-gá, te

ducaⁿ-ni sàndáá iní-í-gá ndéé vitna. ⁸Te vitna sa ndècu túha-ná sá ndúú táhù-í cuèndá sá quidé ndáá-í núú Yă Ndiöxí, te Xítohó Jesucrístú taxi-gá táhù-ăⁿ nduu táhù-í ná sàá nduu, chi cùu-gá ìⁿ Yaá quidé ndáá cuiti, te ñá díú-ní yǔhú taxi-gá táhù-ăⁿ cuu cuèndá-í, chi tnàhá nchaa ñáyiú ndètu cahnu-ná sáá nduu quixi tucu-gá ñuyíú-a cuãñaha-gă táhù-ăⁿ nduu táhù-yu.

Chìuⁿ tahu té Păblú cada té Timùteú

⁹Te cuèní-í sá ìo ndìhi quixi-n quixi coto ñaha-n xii-í. ¹⁰Chi té Dēmás ñá túú-gă quidé cuèndá ñáhá-dě xii-í, chi mee-nă nchaa sá ìo ñuyíú-a ío cùdí ìní-dé. Te ní dándöo ñaha-dě cuáháⁿ-dé ñuú Tesalónica, te té Crèscenté cuáháⁿ-dé cundecu-dé distritú Gàlaciá, te té Títú cuáháⁿ-dé cundecu-dé distritú Dàlmaciá. ¹¹Te ìⁿdìi-ná té Lùcá ndécú ndìhi ñaha-dé xii-í, te cúñaha-n xii-í té Măcú quixi-n ndìhi-dé, chi té-áⁿ ndacu-dé cada-dé ìⁿ chìuⁿ-í. ¹²Te té Tìquicú ní tendaha-ï-dé cuáháⁿ-dé ñuú Éfesú. ¹³Te òrè quixi-n te yáha-n vèhe té Cărpú cáá ñuú Tròás canehe-n ìⁿ dóó tǐcachi ní dándöo-í vehe-dé quixi, ndìhi nchaa librú-í, te tnàhá nchaa dava-gá tutú-í ndécú vèhe-dé canehe-n quixi chi xǎⁿ ío-gá xíní ñùhu-í. ¹⁴Te té Lijandrú té cùu rerú ío vâi sá ñà túú văha ní cuu quide ñaha-dé xii-í, dico mee Yă Ndiöxí náhá-gă nása cada ñaha-gă xii-dé cuèndá sá dúcáⁿ quide-dé. ¹⁵Te vá ñihí tnàhá-n ndìhi-dé chi ío cãháⁿ cuèhé-dé cuèndá nchaa tnúhu cãháⁿ-ó.

¹⁶Te cútnàhá ndécá ñaha-güedé xii-í ní sáháⁿ núú cuè té cùchiuⁿ xito díhna nuu, chi mee dìi ní sáháⁿ te ñá túú ní sãháⁿ ni ìⁿ cue té cùndìhi-í, chi nchaa-güedé ní dándöo ñaha-güedě xii-í, te yúhú xìcáⁿ táhù-í núú Yă Ndiöxí sá vă cáda cuèndá-gá sá dúcáⁿ ñi quide-güedé. ¹⁷Dico Xítohó Jesucrístú ní chindee ñaha-gá xii-í, chi ní taxi-gá tnúhu ndee ìní ní cãháⁿ-í tnúhu-gá năcuáa tàú-xi cunduu núú cuè té-áⁿ ndìhi núú nchaa ñáyiú, dico ñá díú ñáyiú isràél cúü-yu, te diu-gá ní dăcăcu nihnu ñaha-gă xii-í ñá túú ní sãhni ñaha-güedé. ¹⁸Te mee Xítohó Jesucrístú coto ñaha-gă xii-í te ñá túú nă cuu cuèi nándi sá ná cáda ñaha ñáyiú xii-í te diu-ni-gá coto ñaha-gă xii-í ndéé ná sàá nduu sãá-í andiu núú ndécú-gă táxí tnùn-í-gá. Te nchaa-o chǐ ná cãchí-ó sã ìo cãhnu cuu-gá ni caa ni quíhíⁿ. Te ducaⁿ na cùnduu.

Tnúhu ndéé núú ñi ndìhi-ná

¹⁹Te ío cúñaha-n na càda ndee iní tá Priscá, ndìhi té Àquilú, ndìhi cue ñáyiú cùu ndi mee té Onèsíforó. ²⁰Te té Èrastú ní quendóo-dé ñuú Còrintú, te té Tröfimú ní dándöo-í-dé ñuú Miletú chi cùhú-dé. ²¹Te ío cundìhí iní-n quixi-n oré vátá sàá-gá yóo quidé vǐxiⁿ-xi. Te ío cada ndee ìní-n cãchí té

2 TIMOTEO 4

Èúbulú, ndihi té Pùdenté, ndihi té Línú, ndihi tá Clàudiá, ndihi ncha
dava-gá ñáyi sàndáá iní tnúhu Xítohó Jesucristú.

22Te xicáⁿ táhù-í núú Xítohó Jesucristú sá ná cùndecu ndihi ñaha-gá
xii-n ndihi ncha dava-gá-yu. Te ducaⁿ ïo na chìndee chitúu ñaha-gă
xii-ndo nchàa-ndo. Te ducaⁿ na cùnduu. Te ío chí cádá ndèe iní-nă vitna.